

'Kekalkan kuasa penggerak ASEAN'

Sultan Brunei, Anwar tekankan keperluan untuk kekal bersatu dan relevan

Putrajaya: Perdana Menteri, Datuk Seri Anwar Ibrahim dan Sultan Brunei, Hassanal Bolkiah menekankan mengenai keperluan untuk ASEAN kekal bersatu dan relevan.

Ini adalah untuk mengekalkan peranan utama ASEAN sebagai kuasa penggerak utama yang berkesan dan responsif dalam menangani peluang serta cabaran masa depan.

Kedua-dua pemimpin berkata demikian dalam satu kenyataan bersama selepas Rundingan Tahunan Pemimpin Malaysia-Brunei ke-24 di Putrajaya, kelmarin.

"Mereka seterusnya menegaskan komitmen untuk terus bekerjasama dengan Rakan Dialog ASEAN dan mengekalkan pendekatan pandangan luar ASEAN berdasarkan kepentingan dan faedah bersama memajukan lagi usaha pembinaan Komuniti ASEAN," menurut kenyataan itu.

Kedua-dua pemimpin turut membincangkan perkembangan di Myanmar dan menyuarakan kebimbangan mengenai keganasan berterusan di negara itu.

"Kedua-dua pemimpin menyeru Myanmar untuk melaksanakan sepenuhnya Konsensus Lima Perkara (5PC) dan mengulangi pendirian bersatu 5PC kekal sebagai rujukan utama ASEAN untuk menangani krisis politik di Myanmar," menurut kenyataan itu.

Isu Myanmar, Palestin

Kedua-dua pemimpin turut mengesahkan komitmen untuk bekerjasama rapat dalam ASEAN dan rakan kongsi luar yang lain termasuk Pertubuhan Bangsa-Bangsa Bersatu (PBB) untuk menggalakkan kemajuan dalam pelaksanaan 5PC secara keseluruhannya, selaras keputusan pemimpin ASEAN pada Sidang Kemuncak ASEAN ke-42, dengan matlamat akhir mencari penyelesaian yang aman dan berkeadilan, demi kepentingan rakyat Myanmar.

Selain itu, kedua-dua pemimpin menyentuh situasi di wilayah Palestin yang diduduki dan menyuarakan kebimbangan mereka memandangkan tahun ini menandakan ulang tahun ke-75 Nakba, menurut kenyataan itu.



Anwar menerima kunjungan Sultan Hassanal Bolkiah di Kompleks Seri Perdana, Putrajaya.

Nakba merujuk pengusiran besar-besaran rakyat Palestin semasa perang Arab-Israel 1948.

"Pemimpin menyeru Majlis Keselamatan PBB (UNSC) dan anggota masyarakat antarabangsa untuk menuntut pihak yang menduduki menghentikan jenayah kejam terhadap kemanusiaan serta dasar apartheid terhadap rakyat Palestin, dengan tujuan menamatkan pendudukan dan mencapai keamanan menyeluruh dan berkeadilan di Asia Barat selaras undang-undang antarabangsa dan

semua resolusi UNSC berkaitan," menurut kenyataan itu.

Kedua-dua pemimpin juga menegaskan semula pendirian tidak berbelah bahagi rakyat Palestin berhak mendapat hak mereka untuk sebuah negara merdeka dan berdaulat, berdasarkan sempadan sebelum 1967, dengan Baitulmaqdis Timur sebagai ibu negara.

Sultan Hassanal Bolkiah dan Raja Isteri Pengiran Anak Saleha tiba pada Rabu untuk lawatan negara tiga hari ke Malaysia sehingga Jumaat. BERNAMA